

TĀ MOKONUJARANGI BENNETT

*Taku manawa e kakapa nei
E kakapa ana ki te whetū
Ki te marama
Ka tau nei kei te rua
Kātahi au ka kite i te hē*



*Kātahi au ka kite i te mate
Ko taku tau kahurangi
Ka riro kei Paerau
Kei te huinga o te
kahurangi
Ka oti atu koe e.*

Kei te momohe, kei te pārore
kei te māhaki, te wharau a te
tini, te wharau a te mano; te
mūrau a te tini, te mūrau a te
mano, moe mai rā i te moe te
whita, te moe tē rea, tē whakaarahia.

Kia kapo kau noa ake ko te mahara, e koro e, kia
kapo kau noa ake ko te mahara.

Mai i te whakaterenga, i te whakamānutanga o te
waka o Te Kōhanga Reo ko koe tēnā e tū mai ana i
te tauihu, ā, ko ō kaihoe ko ngā ihi, ko ngā wehi, ko
ngā whakamataku tonu o te ao Māori o aua wā arā,
ko Tā Hemi Hēnare tēnā, ko Wī Te Tau Huata tēnā,
ko tōna taina ko Te Okanga tēnā, ko Te Rangihau
tēnā ko wai ake, ko wai ake. Me pēhea te waka e
kore ai e ū ki uta menā koinā te momo o ngā kaihoe?
Me ū ka tika, me ū ka tika !

Nō roto i ngā tau kua āhua
tīkoki te waka engari kāore
anō kia totohu- ko au e kī ana
e kore rawa atu e totohu nā te
momo kaitārai i te waka pēnā

i a koe, i a koutou nā. Ko tā mātou o muri nei he ū
ki te kaupapa ahakoa pēhea ko koutou nā hoki tā
mātau e whakamau atu ai.

Ko te mea nui, e koro e, kia kaua e waiho mā te
waero te māhunga e whakamanana engari kia kaha
tonu ko te māhunga ki te kī atu ki te waero ka nui
tēnā manana mai, anei kē, arā kē.

Wātea kau ana te tūranga o Rehua, e koro e, wātea
kau ana mā wai hoki hei whakakapi?

Kāti, e koro, haere i tō tira mokemoke haere rā,
haere atu rā.

TE NGAHURUTANGA TŌKU REO, TŌKU MANA

Nei tātou kua eke ki te tuangahuru o ngā tau mai
i te whakaterenga o te waka o Te Taura Whiri i
Te Reo Māori. Anei tonu e hoe nei ahakoa
pariparitia mai e ngā tai o whakatakē, o
whakaparanga, o mihi, o whakamiha, koianei
katoa hoki ngā āhuatanga ka pā ki te whakahaere

Māori ahakoa he aha te kaupapa i whakatūria
ai.

I a tātou ka mihi nei ki a tātou mō tātou kua pēnei nei
te nui o ngā tau me hoki whakamuri anō te mahara
ki a rātou i hoe tuatahi ai i te waka, ā, kua ngaro nei
i te tirohanga kanohi.